

## **Convenio de colaboración entre a Consellería de Educación, Universidade e Formación Profesional da Xunta de Galicia e a Asociación Raiolas**

En Santiago de Compostela

### **REUNIDOS**

Dunha parte, Dona **CARMEN POMAR TOJO**, conselleira de Educación, Universidade e Formación Profesional, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, de acordo co seu nomeamento polo Decreto 96/2018, do 26 de setembro, e no uso das atribucións que lle confire o Decreto 106/2018, do 4 de outubro, que modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, e do establecido no Decreto 138/2018, do 8 de novembro, polo que se establece a estrutura orgánica da Consellería de Educación, Universidade e Formación Profesional (en diante a Consellería).

Da outra, dona **Mª INÉS FLORES LOZANO**, presidenta da Asociación Raiolas de Lugo (en diante Raiolas), segundo acordo da Asamblea Xeral de socios en sesión realizada o día 5 de abril de 2014, con CIF G-27255991, con domicilio social Rúa Músico Falla 21, CP 27004 Lugo; inscrita no Rexistro Provincial de Asociacións nº 2000/002292, e declarada de utilidade pública (Diario Oficial de Galicia nº 102, de 27 de maio de 2011).



## EXPOÑEN

1. Que a Consellería é o departamento da Xunta de Galicia ao que lle corresponden as competencias e funcións en materia de planificación, regulación e administración do ensino regrado en toda a súa extensión, niveis, graos, modalidades e especialidades, tal e como establece o Decreto 138/2018, do 8 de novembro, polo que se establece a estrutura orgánica da Consellería.
2. Que a Consellería considera como un dos piares fundamentais dun sistema educativo de calidade a atención á diversidade do alumnado, o que esixe unha acción educativa integral que dea resposta axeitada ás necesidades específicas de apoio educativo, sendo necesario, para este fin, contar con toda a comunidade educativa así como coas entidades, asociacións ou entidades sen ánimo de lucro que adiquen os seus esforzos a esta finalidade.

Neste sentido, tanto na normativa educativa estatal, na Lei orgánica 2/2006, do 3 de maio, de educación, e na súa redacción dada pola Lei orgánica 8/2013, do 9 de decembro, para a mellora da calidade educativa, así como no desenvolvemento curricular estatal e da Comunidade Autónoma de Galicia, faise explícita a atención ao alumnado con necesidade específica de apoio educativo, entre o que se sitúa o alumnado con TEA e/ou Trastorno na Comunicación Social (en diante alumnado con TEA e TCS).

3. Que a Asociación Raiolas é unha asociación sen ánimo de lucro, coa misión de mellorar a calidade de vida das persoas con Trastorno do Espectro Autista e da Comunicación Social así como a das súas familias.

4. Que entre os fins de Raiolas figuran os seguintes:

- a) Facilitar servizos de apoio, orientación e información aos pais e nais que teñan algún fillo/filla afectado por TEA.*
- b) Traballar a prol da plena integración familiar, escolar e laboral das persoas con TEA.*
- c) Realizar tarefas de divulgación social no tocante á realidade do TEA.*



- d) Promover a creación de servizos sociais que contribúan ao coidado e desenvolvemento das persoas con este transtorno.*
- e) Promover e financiar a edición e distribución de publicacións, a celebración de cursos e conferencias, e en xeral, a realización de actividades encamiñadas á formación de pais e nais, titores/as e profesionais relacionados con persoas con TEA.*
- f) Colaborar e intercambiar información, experiencias e servizos con outras Asociacións ou entidades que realicen actividades con fins análogos.*

5. Que o Decreto 229/2011, do 7 de decembro, polo que se regula a atención á diversidade do alumnado dos centros docentes da Comunidade Autónoma de Galicia nos que se imparten as ensinanzas establecidas na Lei orgánica 2/2006, do 3 de maio, de educación, dispón que o alumnado con necesidade específica de apoio educativo pode requirir “apoios ou provisións educativas diferentes ás ordinarias e que a consellería con competencias en materia de educación promoverá a colaboración entre as distintas administracións, entidades, asociacións e outras organizacións sen ánimo de lucro e con atribucións na prevención, detección temperá e intervención educativa co alumnado, establecendo protocolos comúns de actuación e favorecendo o intercambio de información e a difusión de boas prácticas”.

En atención a estas consideracións, as dúas institucións teñen a vontade de sumar os esforzos que realizan no campo da atención educativa ao alumnado con TEA e TCS.

En consecuencia, a Consellería e Raiolas acordan subscribir este convenio conforme as seguintes

## CLÁUSULAS



**Primeira. Obxecto do convenio**

O convenio ten por obxecto establecer as condicións da colaboración entre a Consellería e Raiolas nas accións e actividades dirixidas á mellora da atención educativa ao alumnado con TEA e TCS.

**Segunda. Pessoas beneficiarias**

As persoas beneficiarias da colaboración prevista neste convenio, serán o alumnado con TEA e TCS e que recibe apoio de Raiolas, de todas as etapas e niveis regulados pola Lei orgánica 2/2006, do 3 de maio, de educación, e na súa redacción dada pola Lei orgánica 8/2013, do 9 de decembro, para a mellora da calidade educativa, escolarizado en centros sostidos con fondos públicos dependentes da Consellería, así como o profesorado e as familias dese alumnado.

**Terceira. Desenvolvemento da colaboración**

1. A Consellería promoverá na formación permanente do profesorado, que desenvolve por medio das estruturas de formación e nas distintas modalidades formativas, a colaboración de Raiolas nas accións relativas á atención á diversidade e á formación do profesorado que atende ao alumnado con TEA e TCS.
2. A Consellería e Raiolas colaborarán na sensibilización e na difusión de materiais e documentos que permitan un maior coñecemento das circunstancias específicas asociadas ao alumnado con TEA e TCS.
3. A Consellería facilitará a colaboración do persoal profesional de Raiolas nos centros docentes dependentes da Consellería con escolarización de alumnado con TEA e TCS.

A solicitude de colaboración do persoal profesional de Raiolas debe realizarse por parte do centro docente, e as liñas xerais desa colaboración poderán ser:

- a) *Asesoramento na atención educativa ao alumnado con TEA e TCS escolarizado nos centros sostidos con fondos públicos dependentes da Consellería, así como aos centros que escolaricen a este alumnado, ao seu profesorado e ás súas familias.*



*b) Propoñer actuacións de carácter preventivo e concretas, que poderán ser levadas a cabo polo equipo docente do centro educativo, dirixidas ao alumnado con TEA e TCS.*

*c) Colaboración na orientación sobre metodoloxías axeitadas dirixidas á intervención educativa do alumnado con TEA e TCS.*

*d) Información e formación naqueles aspectos que o persoal dos centros docentes requira en relación co tratamento educativo do alumnado con TEA e TCS.*

**Cuarta. Características da colaboración do persoal de Raiolas nos centros docentes**

1. Tendo en conta os termos xerais referidos na cláusula anterior e o principio de autonomía pedagóxica, organizativa e de xestión dos centros docentes, o director ou a directora de cada centro, o persoal especialista de Raiolas e as familias do alumnado con TEA e TCS, establecerán de mutuo acordo e por escrito segundo o establecido neste convenio, os termos concretos desa colaboración. Eses termos deben formar parte das medidas de atención á diversidade previstas no Plan Xeral de Atención á Diversidade, das normas de organización, funcionamento e convivencia e/ou das correspondentes programacións xerais anuais de cada centro.

2. O profesorado titor ou, se é o caso, profesorado designado pola dirección do centro será o responsable de coordinar as posibles actuacións concretas das persoas especialistas en alumnado con TEA e TCS, en cada un dos casos e de manter informada a cada unha das familias.

3. As actuacións do persoal especialista de Raiolas nos centros docentes, entenderanse dentro do principio de colaboración entre todas as persoas que atenden a un mesmo alumno ou alumna e coa finalidade de facilitarlle unha atención educativa inclusiva e axustada á súa particular forma de ser e de aprender. Este persoal deberá reunir a formación profesional e técnica adecuada que se require para atender ao alumnado con TEA e TCS; ter cumprida a obriga imposta polo artigo 13.5 da Lei orgánica 1/1996, do 15 de xaneiro, de protección xurídica do menor (LOPXM), introducido pola Lei 26/2015, do 28 de xullo, de modificación do sistema de protección á infancia e á adolescencia; ter regularizada a súa situación laboral con Raiolas e respectar os principios de autonomía organizativa de cada centro docente, así como o seu proxecto educativo.



**Quinta. Financiamento**

Este convenio non leva consigo aparelladas obrigas económicas para ningunha das partes.

**Sexta. Relacións laborais**

A subscrición deste convenio non implica relación laboral contractual ou de calquera outro tipo entre o persoal de Raiolas e a Xunta de Galicia, de tal modo que non se lle poderá esixir ningunha responsabilidade, nin directa, nin indirecta, nin subsidiaria, polos actos ou feitos ocorridos durante a execución das actuacións e/ou a vixencia deste convenio.

**Sétima. Comisión de seguimento**

1. Para a coordinación e desenvolvemento deste convenio constituirase unha comisión mixta, formada por catro persoas. Cada unha das partes designará dúas, correspondendo a presidencia e a secretaría da comisión ás persoas representantes da Consellería.
2. A comisión reunirse, con carácter ordinario, unha vez cada curso escolar. A reunión terá lugar no primeiro trimestre do curso, logo da convocatoria realizada pola presidencia da comisión, e sempre que unha das partes o solicite.
3. Correspóndeñlle á comisión mixta as seguintes atribucións:
  - a) Velar polo adecuado desenvolvemento do convenio e resolver calquera dúbida que se xere respecto del, sen prexuízo do establecido na lexislación correspondente.
  - b) Analizar o funcionamento desta colaboración e realizar, de ser o caso, propostas de mellora.
  - c) Elaborar unha ficha de seguimento anual do convenio sobre o funcionamento do mesmo.
  - d) Difundir e promover o convenio asinado entre ambas as partes.

**Oitava. Interpretación do convenio**



Segundo o artigo 4 da Lei 9/2017, do 8 de novembro, de contratos do sector público, as relacións xurídicas, os negocios e os contratos excluídos do ámbito desta lei rexeranse polas súas normas especiais, aplicándose os principios da mesma para resolver as dúbihdas e lagoas que se puidesen presentar.

Así pois, as dúbihdas que puidesen xurdir en relación coa interpretación das cláusulas deste convenio, que ten carácter administrativo, serán resoltas pola comisión mixta. En caso de discrepancias, a súa interpretación, cumprimento e execución corresponderá aos tribunais contencioso-administrativos, tralo esgotamento da vía administrativa.

#### ***Novena. Protección de datos e confidencialidade***

Ambas as partes comprométense a cumplir as obrigas que se derivan da normativa en protección de datos que se desprende da Lei orgánica 3/2018, do 5 de decembro, de protección de datos persoais e garantía dos dereitos dixitais, ditada para adaptar a lexislación española ao Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se deroga a Directiva 95/46/CE (Regulamento xeral de protección de datos).

#### ***Décima. Transparencia***

As partes asinantes deberán cumplir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia, incluíndo os datos identificativos das persoas asinantes.

#### ***Undécima. Vixencia***

Este convenio entrará en vigor o 1 de setembro de 2020 e durará ata finais do curso académico 2020-2021, isto é o día 31 de agosto de 2021, sendo prorrogado automaticamente por cursos académicos sucesivos, salvo denuncia expresa dunha das partes asinantes e cunha notificación á outra de dous meses de antelación. O seu contido





poderá ser modificado, por mutuo acordo das partes, mediante a subscrición do oportuno acordo de modificación.

De conformidade co establecido no artigo 49 da Lei 40/2015, do 1 de outubro, de réxime xurídico do sector público, a vixencia máxima do convenio non poderá superar 4 cursos escolares.

Lido o Convenio asínase dixitalmente polas partes.

POLA CONSELLERÍA DE EDUCACIÓN,  
UNIVERSIDADE E FORMACIÓN  
PROFESIONAL,  
A CONSELLEIRA,

Carmen Pomar Tojo

POLA ASOCIACIÓN RAIOLAS  
A PRESIDENTA,

María Inés Flores Lozano